

Ti xroon chr'éhen Pablo ti sin

Galacia

**Ti xroon k'uáyéhe ti
sin nínko Galacia**

1 ¹Janhan, Pablo, kjueyána Ìnchéni kixin sít'ahá ch'an ixra. Jehya chojni kjueyána la ko jehya chojni k'uetuana. Náhi. Kjueyána Jesucristo la ko It'éni Díos, ti nkexro kjuínchexechón Jesús. ²Janhan la ko kaín ti sin kíchóni tjékian ntihi mé ikjini ti xroon i, ts'áyéhe ti nínko tjejó Galacia. ³It'éni Díos la ko Ìnchéni Jesucristo chrókjuincheñaora kixin kjuaxróxin chrók'uejora. ⁴Ìnchéni Jesucristo mé kuamá ti ijíeni k'uenyákohe ch'an ti jeheni kixin tsaáxini ti jehe ch'an kixin chrók'uitjáñaxínhñani ti nkehe jínahña síin chjasintajni. Mé xíkaha tjinkaon It'éni Díos. ⁵Méxra It'éni Díos chrók'uáyéhe kaín kjuasàya nkochríxin. Mé xíkaha tsohen.

Kohya ijnko itan tsaáxini

⁶Imá tóxakona kixin imá tjoka kuitohéra Díos, ti nkexro tsíkjeýá ti jahara kixin tjuahára Cristo. Ndá ijie tjinkaonra tsochrehéra

ókjé itan. ⁷Kjánchó ti chaxín la jehya kixin síin íjnko tan tsajon kjuachón. Náhi. Jehó iso chojni la tjinkaon tsjixrónkáxin la ko tsjitóxin ti itan tsaáxini kuènté Cristo. ⁸Méxra kjónté jeheni o ijnko ángel tsixin nkajni tsjako ókjé itan, jehya éxi ti itan nixin ó kjuákohára, la tsjasóte sin nkochríxin. ⁹Ínaá ndáxrjan kixin ti nkojín nkexro tsjako ókjé itan tsaáxinra jehya éxi ti itan ó kuitekáonra, la tsjasóte sin nkochríxin.

¹⁰Méxra janhan la tjéyáhya kixin chojni ó chrókóxríhín ti ixra it'a. Náhi. Tjínkəoan sintaxiteyá ti nkehe tóxríhín Díos. Andá ti chrókjuéyá kixin chrókjuikosáyana chojni ó, la jehya ijnko nkexro ch'ehe ixra Cristo ti janhan.

Ti ixra kjuích'e Pablo

¹¹Méxra jahara kíchóni, chrókónohara kixin ti itan tjàkua la jehya tixin ti nkehe kjuénkayáxin chojni chjasintajni ó. ¹²Kixin ninkexró kjuakəəhya ti janhan la ko ninkexró kjuajonhña tíhi. Ìnchéni Jesucristo mé kjuako.

¹³*Jahara la ó kuihínra nkexrín kjuak'é ósé, ti naxa k'uékitekəoan éxi ti sin judío. La k'uékónínkəonhan ti sin tinkáchónki Díos la ko tjínkəoan chrókjuintak'itjáña sin. ¹⁴*Ti naxa k'uékjit'a éxi ti sin judío la antsí k'uénona ti ley ke ti sin chjasená, kjónté nkokón nánó k'uéchontakian sin. Janhan la antsí kjuintaxiteyá la ko kjuikosáyaha ti nkehe tsík'etəoan ti sin k'uaxrjeníxian k'uejó ósé. ¹⁵*Kjánchó Díos kjueyána kjónté naxa tókjínahña kixin imá tjuəna ch'an. ¹⁶Díos kjuínchenona nkexrín itjen ti Xjeen ch'an kixin tsjákoəa ti sin jehya judío ti itan tsaáxini. Ti ó kóhen tíha la kjuánchánkíəhya nijno chojni chjasintajni nkexrín chrókjuít'a ¹⁷la ko kjaxin kjuítsjahya ti sin apóstol tjejó Jerusalén. Náhí. Janhuán sákjuia chjasin Arabia, ndá chr'éxin ikjan Damasco. ¹⁸*Ndá k'uatsínka iní nánó, ndá sákjuia Jerusalén kjuichráha Pedro, ndá ntiha kjuak'é quince ñao, ¹⁹kjánchó k'uíkonhña ti íso sin apóstol. Jehó k'uíkuə Jacobo, kícho Ìnchéni. ²⁰Díos la tjetsjehe kixin ti nkehe ikjian la chaxín tíha, jehya kjuach'ia. ²¹Ndá chr'éxin sákjuia chjasin Siria la ko Cilicia. ²²Andá ti sin kíchóni nínko tjejó Judea mé naxa tjatsoanhña sin ti janhan. ²³La jehó kuíhin sin: “Ti nkexro

i, k'uéchréə la ko chrók'óñá ti sin tinkáchónki Ìnchéni, andá ijie tjako ch'an ti itan chrókjuinchek'itjáña ch'an senó.” ²⁴La chjéhe sin kjuasáya Díos kixin ó tinkachónkia Ìnchéni.

Pablo la ko ti sin tsíkjeýá Jesús

2 ¹*K'uatsínka catorce nánó, ndá sákjuia Jerusalén ínaá, sákjuikian Bernabé la ko Tito. ²Sákjuia ntiha kixin Díos kjuínchenona la ntiha kónkotsékian jehó ti sin t'etəoan nínko, la xrjankaxián nkexrín tjákoəa ti sin jehya judío ti itan tsaáxini. Xíkaha kjuít'a kixin tjínkəonhña kixin ti ixra kjuít'a la chrókóchónkó tíha. ³Méxra ch'in Tito kjuák'ekian la jehe ch'an ijno chojni griego, la kjónté xíkaha, la k'uetuənhña sin kixin chrókua ch'an ti xroye kuènté sin judío. ⁴Kjónté iso ti sin chaxínhña tinkáchónki Ìnchéni k'uejó ntiha kixin tsotsjehe sin nkexrín ti kjuachaxin chóntani kixin tinkáchónkini Cristo Jesús kixin tjínkaon sin kixin chrókjuinchexiteyéheni ti ley ínaá. ⁵Kjánchó kuáhyani kuentá ti nkehe ichro sin kixin tjinkakonhñani chrókjuénkəəaxinra kixin tichánxin chrókuara ti xroye, jehó tjínkaoni kixin naxa chrókuitekəonra ti itan ndoá tsaáxini.

1:13: Hch. 8:3; 22:4, 5; 26:9-11. 1:14: Hch. 22:3.

1:15: Hch. 9:3-6; 22:6-10; 26:13-18. 1:18: Hch. 9:26-30. 2:1: Hch. 11:30; 15:2.

©2016 Wycliffe Bible Translators, Inc

<http://creativecommons.org/licenses/by-nc-nd/2.5/mx/>

⁶*La kjónté ti sin t'etōan kuènté n̄nko la kjuakohya sin f̄nko nkehe n̄xin. (Jeheni la tsjehyani á chojni t'etōan o náhi kixin Díos la nkokón t'ikon kaín chojni.) ⁷La kjuátsoan sin kixin Díos ó kjuajon ti ixra i kixin tsjákohá ti sin jehya judío ti itan j̄na éxi tsichjéhe Díos ixra Pedro tsjakohe ch'an ti sin judío. ⁸Kixin ti Díos tsík'etuehen Pedro ts'óna apóstol tsjakohe ti sin judío, la kjaxin k'uetoan ch'an janhan ts'óna apóstol tsjákohā ti sin jehya judío.

⁹Méxra Jacobo, Pedro la ko Juan, ti sin t'etōan kuènté n̄nko, la kjuátsoan sin kixin Díos tsík'ajon kjuachaxin tsjákuá. Ndá kjuénkayáxinkoni sin kixin jeheni tsjakohe ni ti sin jehya judío, andá jehe sin tsjakohe sin ti sin judío. Ndá kóchéhe sin kixin nkokón ich'eni ixra la itsé sin itjani. ¹⁰Jehó kjuanchia sin kixin chrók'uitjáñehñani tsjink̄isani ti sin nóa, ndá tíha la ó xráxín ich'eni.

**Pablo kjuenduéhe Pedro
chjasin Antioquía**

¹¹Andá ti ó kjujji Pedro chjasin Antioquía la janhan kjuenduáha ch'an kixin nduáhya kjuénkayáxin ch'an. ¹²Kixin k'uékjinieko ch'an ti chojni jehya judío, hasta kjujijia iso ti sin judío tsíchr'án Jacobo. Ndá kjuankíxin k'uaxrjenta ch'in

Pedro la í kjoniekohña ch'an ti sin jehya judío, kixin chrákonhen ch'an ti sin kjujji. ¹³La xikaha ti iso sin kíchóni judío la kjaxin kuitekakohen sin Pedro, kjónté nduáhya kjuénkayáxin ch'an. La kjaxin ch'in Bernabé la kjuacha sin kjuachròe sin ch'an. ¹⁴Andá ti ó k'uíkuān kixin kjuakoxinhña ch'an éxi chrónka ti itan j̄na tsaáxini, la nixjahā Pedro nkayakon kaín ti sin tsíkónkotsé. Ndáxrjan: “Jaha la ijnko chojni judío, la tjákoxián éxi jehya ijnko chojni judío kixin titekaonhña ti ley. ¿Nkekuènté tétuehén ti sin jehya judío kixin chrókuitekaon sin éxi ti sin judío?”

**Kaín chojni la tsaá sin kixin
titekaon sin Ìnehéni**

¹⁵Jeheni la tsík'axrjenixini chojni judío la jehya k'uaxrjenixini chojni jehya judío chóna nchónhña ijje. ¹⁶*Kjánchó noheni kixin ti nkehe tsík'etōan Moisés la xrokjuahya ts'óxika ti ijjéni, kixin ti sin tsj̄in ti ijje mé jehó ti sin tinkáchónki Jesucristo. Andá jeheni la tinkáchónkini Ìnehéni Jesucristo kixin tjinkaoni ts'óxika ch'an ti ijjéni kixin titekaoni ch'an. Andá ti ley la tsjachahya ts'óxika ti ijje chojni.

¹⁷Andá ti chaxín tjinkaoni kixin Cristo ts'óxika ti ijjéni, ndá tsonoheni kixin kjuasini ijje éxi ti iso sin, la, zá tsjenkayáxini

kixin Cristo k'uetōan tsjasini ijie ní? Kjá náhí. ¹⁸Ti kuitōha ti ley, ndá naxa chrókjan chrókjuintaxiteyáha inaá la táha la ó ijie kuéntana. ¹⁹Ti ley la kjuanchia ijie chrók'uenxian, andá ijie la tjéchuān kixin sít'a ixra kuènté Díos. ²⁰Janhan la éxi ik'uén kixin k'uenkian Cristo ti kjuák'enkáni ch'an ntacruz, Andá ijie la jehya janhan tjéchuān. Cristo mé tjéchónxian janhan. Ijie la tjéchónxian ti cuerpo chonta kixin tinkachónkia ti Xjeen Díos kixin jehe ch'an la tjuāna ch'an la k'uenyákoheñ ch'an ti janhan. ²¹Tjínkakhonña tsitōha ti tjuāna Díos. Kixin ti chrókjuacha ti ley chrók'óxika ijie chojni la kjá chónkó ik'uén Cristo ti xikaha.

**T'áyeheni nchakuén
Díos ti ó titekaoni**

3 ¹Jahara chojni gálatas, imá lontira. ¿Xá nkexro kjuít'ayahara kixin kuitekáonra ti nkehe chaxínhña? Kixin janhan kjuákohára nkexrín k'uénxin Cristo ti ntacruz. ²Nkokoa nkehe tjínkaōan tsjatehéra. ¿Á k'uayéhéra Nchakuén Díos kixin kjuínchexiteyára ti ley kuènté Moisés ní, o k'uayéhéra tíha kixin kuitekáonra ti itan jína kuihínra? ³Nkexrín kixin imá lontira. Ti

Nchakuén Díos kjuínkítsa ti kjuankixixínra kuitekáonra. Ndá ijie, ¿á tjinkáonra xíkjanra sinchexiteyéhéra ti ley ní? ⁴Nchónhña kjuasótiara kixin kuitekáonra itén Díos. Andá ijie la, ¿á chónkó kaín tíha ní? ¿Kjá náhí? ⁵Ti kjuajon Díos ti Nchakuén ch'an la ko kjuasin ch'an itsjé kjuaxroan k'uíkonra, la, ¿nkekuènté xíkaha kjuakoxin ch'an? Jehya kixin kjuínchexiteyára ti ley. Náhí. Kaín tíhi la kóhen kixin kuitekáonra ti itan jína kuihínra.

⁶*Abraham la kuitekaon Díos ndá Díos ndáchro kixin jína ch'an. ⁷*Méxra chrókónohara kixin ti chojni chaxín xjeen Abraham la mé ti sin chaxín titekaon Díos. ⁸*Méxra ti xroon itén Díos chronka kixin ti sin jehya judío la kjaxin sin tsaá sin kixin tinkachónki sin Díos. Mé xíkaha ósé tsíkihin Abraham ti itan jína ndáchro: “Kaín naciōn tsoñaoxín sin ti jaha.” ⁹Mé xíkaha kaín ti sin chaxín titekaon Díos mé tsoñao sin éxi kóñao Abraham kixin kuitekaon ch'an Díos.

¹⁰*Ti chojni tjenkayáxin kixin tsaáxin sin ti nkehe tsík'etōan Moisés la ts'áyehē sin ti kjuanínkaon kuènté Díos, kixin ndáchro xroon itén Díos: “Kaín ti chojni tsjachahya sinchexiteyá ti ley la tsjasóte.” ¹¹*Méxra kohya nkexro ts'óxika ijie sin ti

tsitekaon sin ti ley. Kixin ti xroon itén Díos ndáchro: “Ti nkexro ó xika ijíé kixin tinkáchónki Díos la tíha ts'ejóchónxin sin nkochrín.” ¹² *Méxra ti ley tsík'etōan Moisés la nixjahya nkexrín tsitekaoni Díos. Náhí. Ndáchro kixin: “Ti nkexro sinchexiteyá kaín ti nkehe t'etōan ti ley la ts'ejóchón sin kixin nchexiteyá sin.” ¹³ *Ndá Cristo kjuatsen kaín ti chrókjuasótexíni éxi kjuanchia ti ley k'uáyéhe Moisés. Jehe ch'an kjuák'enkání ch'an ti ntacruz la kjuasóte ch'an kixin ti ijíéni. Ndáchro xroon itén Díos: “Díos la nínkakohen kaín nkexro t'ejótjān ijnko inta.” ¹⁴ Mé xikaha kóhen kixin ti tsíndáchro Díos sincheñao Abraham, la kjaxin ti sin jehya judío ts'áyéhe tíha kixin Jesucristo k'uénxin ti ntacruz. La xikaha ti tinkáchónkini Díos la kaíni ts'áyéheni ti Nchakuén Díos éxi tsíndáchro Díos.

**Ti ley la ko ti nkehe
tsjajon Díos**

¹⁵ Kíchóni, sintayóaxián ijnko nkehe chjasintajni kixin tsiénxinra jína. Ti ijnko chojni ch'éna ijnko xroon ndáchro nkexro tsítōnhen ti nkehe chóntha sin la chóntha firma kuènté sin, la ninkexró xitjahya ts'óxika tíhi la ko ninkexró xitjahya sich'éna ijnko nkehe. ¹⁶ Andá Díos mé tsíchenka Abraham

kixin sincheñao ch'an ti nkexro ts'axrjeníxin ch'an. Ti xroon itén Díos la ndáchrohya kixin kaín ti nkexro ts'axrjeníxin Abraham ts'áyéhe tíha. Náhí. Ndáchro kixin nkokoā ti nkexro ts'axrjeníxin Abraham mé ts'áyéhe tíha, mé tíha la Cristo. ¹⁷ *Méxra ndáxrjan tíhi. Díos chenka Abraham ijnko nkehe chaxín tsoxiteyá, la tíha mé éxi ijnko firma. La cuatrocientos treinta nánó chr'éxin, ndá ikui ti ley k'uáyéhe Moisés. La ti ley xitjahya ts'óxika ti nkehe tsíndáchro Díos la ko xitjahya tsondáchro kixin tjetōanhña ti nkehe tsíndáchro ch'an. ¹⁸ *Andá ti ticháxin chrókuitekaoni ti ley ndá chrók'uáyéheni ti nkehe tsjajon Díos, la ti nkehe tsíndáchro Díos senó la chróxiteyáhya. Andá Díos mé tsíchenka Abraham kixin ts'áyéhe ch'an ti nkehe tsíndáchro ch'an jehó kixin kuitekaon ch'an Díos.

¹⁹ Andá, ¿nkekuènté itjen ti ley kuènté Moisés? Kjuajon Díos tíha kixin tsonoexín chojni kixin nduáhya ti ijíé tjasin sin. K'uetōan Díos sinchexiteyéhe chojni ti nkehe tsík'etōan Moisés hasta itsi ti nkexro ts'axrjeníxin Abraham, mé ti nkexro kjueyá Díos kixin sinchexiteyá ti nkehe tsíndáchro ch'an. Ti ley mé chrónka ti sin ángel la k'uáyéhe Moisés la jehe ch'an

jehó chrónkaxón ch'an. ²⁰Andá ti ikjo Díos ch'in Abraham, la chr'ánhña ch'an ijnko chojni chróchronka tíha. Náhí, Díos nixja.

¿Nkekuènté sínkí ti ley?

²¹Ndá ti xíkaha la, ¿xá t'axrjexín kixin ti ley tsík'etōan Moisés la chrónka ijnko nkehe ke ti nkehe tsjajon Díos ní? Náhí. Ti chrókjuacha ti ley chrókjuajon kjuachón, la chrók'óxika ti ijíeni ti chrókuitekaoni ti ley la kjá táhó chrókótjuáxini. ²²Kjánchó ti xroon itén Díos ndáchro kixin ti ijie la naxa t'etuehen kaín chojni. Jehó ti nkexro tsitekaon Jesucristo la ts'áyéhe sin ti nkehe tsjajon Díos.

²³Ti naxa tihya Cristo, la ti ley la kuék'etuehen ti jeheni. La k'uejóchóheni kixin Díos chrókjuinchenoheni nkexrín chrókuinkáchónkini Ìnchéni.

²⁴Ti ley mé éxi ijnko chojni tjakohe chájan, mé kjuakohe ti jeheni hasta kuijia Cristo. Andá ijie la jehe ch'an kjuatsen ch'an ti ijíeni kixin kuitekaoni ch'an. ²⁵Andá ijie ó kuitekaoni Cristo la ti ley í t'etuehña ti jeheni.

²⁶Kixin jahara ó tinkachónkira Jesucristo la kaínra ó k'ónara xjeen Díos. ²⁷Kixin kaínra kuíkitera, la ijie nkokoa tjejokōara Cristo, la k'ónara ijnko chojni nixin kixin titekáonra ti jehe ch'an. ²⁸Ndá ijie la í

tjetoanhña á chojni judío o náhí, á chojni ch'exón xra o chojni t'etōan, chojnindoa o chojnichjin. Ti tjejókoni Cristo la nkokoa tjejóni kaín. ²⁹*Andá ti chaxín tinkáchónkini Cristo la chaxín tsík'axrjenixini Abraham la ó chóntani kjuachaxin ts'áyéheni ti nkehe tsjajon Díos.

4 ¹Mé xíkaha ndáxrjan: Ijnko chájan ti ó tsíkitoeko ti nkehe k'uechóna it'é la tóyóhe xjan éxi ijnko chojni ch'exón ixra, kixin naxa xjantsí xjan la naxa xitjahya ts'etōan xjan, kjónté kuènté xjan kaín nkehe. ²Siín nkexro t'ayakohen ti ixjan la ko ti ixra kuènté xjan hasta tsjixrakájña ti ñao tsík'etōan ti it'é xjan ndá ts'áyéhe xjan kaín tíha. ³Mé xíkaha jeheni ti naxa k'ueñoehñani ti jína, la ti nchakuén jínahña t'etōan chjasintajni kuék'etuehen ti jeheni. ⁴Kjánchó ti ó kjuixraká ti ñao kjuák'e Díos, la ichr'án ch'an ti Xjeen ch'an ikui k'uaxrjenixin ijnko chojnichjin. La kjuínchexiteyá ch'an kaín ti nkehe t'etōan ti ley kuènté Moisés. ⁵*Ikui ch'an kjuenkayákohen ch'an ti jeheni kixin chrókjuasótéxinhñani ti ley. Ndá ijie k'ónani xjeen Díos. ⁶Díos kjuakoqxin kixin chaxín xjeen ch'an ti jeheni kixin ichr'án ch'an ti Nchakuén Xjeen ch'an chóntani, la ti Nchakuén ch'an chóntani mé t'éya ndáchro:

“Paapa.” ⁷Mé xikaha jaha la í jehya ijnko chojni t'ítuehen. Náhí. Jaha la ó k'óna xjeen Díos. Landá kaín ti nkehe kuènté Díos mé ts'óna kuèntá kjaxin kixin tinkachónkia Cristo.

Pablo kjuenduéhe sin kixin í tsjasinhña sin ijie

⁸Ósé ti naxa k'uéchonhñara Díos la k'uékjinchexiteyéhéra ti díos chaxínhña. ⁹Andá ijie la ó choxínra Díos, o ícha jína chróndáchroni Díos ó chóxin ti jahara. La ¿nkexrín kixin naxa tjinkáonra chrókjanra chrókuinkachónkíra ti nkehe chóntahya kjuachaxin la ko chónkó? ¹⁰Jahara naxa tjásinra kia tsjikosáyehéra nkojín ñao, nitjó o nkojín nánó. ¹¹Imá tóxakona kixin kjá ó chónkó ti ixra kjuít'a.

¹²Kíchóni, xrjanoáhára kixin chrókjanra chrókóyóhara ti janhan chrókuitekákonhñara ti ley éxi janhan kóyóna éxi ti jahara ti k'uéchoxínhña ti ley. La ninkehó nkehe jínahña kjuich'ehera ti janhan. ¹³Ó nohara kixin ti saoxín kjuákohára ti itan jína tsaáxini la k'uénína. ¹⁴K'uétjahára ixra kixin k'uénína la kjónté k'uéchontara kjuasàya ti janhan la kjuanoáhñarani la jína kjuájonra kjuachaxin kjuak'é ntiha éxi ijnko ángel kuènté Díos o éxi Inchéni Jesucristo

chrókjuíji xikaha. ¹⁵¿Nkehe kóhen ti kjuachéhe k'uéchontara? Chaxín ndáxrjan kixin imá jínara kixin ti chrókójína la hasta ti ikonra chrókuakitsjenkíra chrókjuájonra. ¹⁶Andá ijie la, ¿á kóninkákohénra ti janhan kixin kjuákohára ti nkehe chaxín ní?

¹⁷Ti chojni nduáhya tjako la imá tjinkaon sin chrókjuít'ayahara sin. Kjánchó nduáhya ti nkehe tjenkayáxin sin kixin tjinkaon sin kixin chrókuítóhéra ti jeheni, ndá chróchréhéra ti jehe sin. ¹⁸Kjá jína chrókjuinkítsa sin ti jahara ti chaxín ndoá tjenkayáxin sin, kjánchó nkochrín jína chrókjuích'e sin jehya jehó ti ó chrókjuak'é ti tjejora. ¹⁹Xjeeni, imá tjtóte asená kixin tóxakona nkexrín tjejora. Éxi ijnko ññé xjan tjtóte ti ó nchekokjíhi xjan, mé xikaha naxa jtétjasóte kixin tjínkəoan kixin chaxín chrókjuénkayáxinra éxi tjinkaon Cristo. ²⁰Ti chrókójína chrókjuak'é ntiha la antsí jína chrónixjahára, ndá ijie ikjín itjén la nonahña nkexrín tjejora.

Kjuíncheyóexin Pablo ti tjan Agar la ko Sara

²¹Jahara ti naxa tjinkáonra chrókjuínchexiteyéhéra ti ley tsík'ətoan Moisés, la chronkara, ¿á kíenhñara nkehe ichro ti ley ní? ²²*Ndáchro xroon itén Díos kixin Abraham kóchóna

yaá xjeen, ijnko la xjeen ti tjan ch'exón ixra ndá ti ijnko mé xjeen ichjién ch'an. ²³ Ti xjeen ti tjan ch'exón ixra la kokjíhi éxi tjenkayáxin chojni ó. Andá xjeen ti tjan chaxín ichjién Abraham mé kokjíhi xjan kixin xiteyá ti nkehe tsíndácho Díos. ²⁴ Tíhi mé t'axrjexín kixin ti yaá chojnichjin mé tóyóhe ti yaá nkehe tsíndácho Díos. Ti tjan Agar mé yóhe ti ley xránjonxín ti ijna Sinaí la ti chojni titekaon tíha mé tokjíexien sin sich'exón sin ixra. ²⁵ Mé xikaha ti tjan Agar mé yóhe ti ijna Sinaí tjan Arabia la tíha tóyóhe ti chjasin Jerusalén ntihi kixin ti chjasin la ko ti sin tjejó ntiha la ko kaín xjeen sin mé ti ley t'etuehen ti jehe sin. ²⁶ Andá tjan Sara la yóhe ti chjasin Jerusalén itjen nkaya nkajní mé t'etuenhña ti ley. Andá tíha mé ti chjasin kuènténi jeheni. ²⁷ *Ndácho xroon itén Díos:

Chrokocháha jaha chojnichjin xrokjuahya tsochonta ixjan,
chrók'oyakuan kixin chonta kjuachéhe jaha k'uíkonhña ninkehó kjuatjoté kixin kjuinchekokjéheya xjan.
Andá ti tjan tsíkítsinkehe la antsí tsochónta nchónhña xjan ke ti tjan chóna xì.

²⁸ Kíchóni, jeheni mé éxi Isaac, ti ixjan tsíndácho Díos tsochónta Abraham, kixin

kaíni la xjeen Díos kixin xikaha tsíndácho ch'an. ²⁹ *Mé xikaha ósé ti xjan saó tsíkokjíhi, xjeen Agar, la kóninkakohen Isaac, ti xjan kokjíhi kjuachaxien Nchakuén Díos. Mé xikaha sítóhen ijie. ³⁰ *Kjánchó ndácho ti xroon itén Díos éxi Díos tsíndáche ch'in Abraham: “Takítsjexián ntihi ti tjan ch'exón ixra sátsji tjan la ko ti xjeen tjan, kixin ti xjeen tjan la ts'áyèhya ti nkehe tsitonhen ti xjeen ti tjan chóna kjuachaxin.” ³¹ Mé xikaha kíchóni, jeheni la jehya xjeen ti tjan ch'exón ixra. Náhí. Jeheni mé xjeen ti tjan chóna kjuachaxin.

Jína chrók'uejora kixin kuaáxinra Cristo

5 ¹ Cristo mé kuaáxini, la ti ley í t'etuenhña ti jeheni. Méxra ndoá chrók'uejora la jína titekáonra Cristo la í chrókjanhñara chrók'ónara ijnko chojni t'ítuehen.

² Tihínra, janhan, Pablo, ndáxrjan kixin ti naxa chrókuara xroye éxi t'etóan ti ley, la ó chónkó tinkachónkira Cristo.

³ Méxra tjínkaon tsoxrjanka ínaá kixin ti nkojín nkexro itsa ti xroye éxi t'etóan ti ley, la ticháxin sinchexiteyá sin kaín ti ley tsíkajon Moisés.

⁴ Andá jahara, ti tjínkaonra ts'ónara ijnko chojni jína kixin nchexiteyéhéra ti ley, la ó chónkó

tíha kixin kujtohéra Cristo la ko ti tjuahára Díos. ⁵Andá jeheni kjuasáye Nchakuén Díos tjinkĩtsa, la tjejóchóheni kixin tsjintaxín chrókótjójá ti ijjeni kixin titekaoni Cristo. ⁶Kixin ti tinkáchónkini Jesucristo, la í jehya tjeoan ti xroye. Antsí tjeoan chrókuinkáchónkini Ìnchéni, la tíha chrókuinkĩtsa chrók'uejóni jína la ko chrótjueheni kichóni.

⁷Jahara la ó jína k'uejora. Andá ijie, ¿xá nkexro k'ueoan kixin tsitohéra ti nkehe chaxín? ⁸Ti nkehe tjejoch'era, la jehya ti nkehe tjinkaon Díos, ti nkexro kjueyá ti jahara. ⁹*Ó nohara éxi ndáchro sin, intsíkoá ti nkehe t'ánkixin niotja, la nchek'ánkí kuenté ti ich'o. ¹⁰Ndá janhan ó nona kixin Ìnchéni tsjinkĩtsa kixin tsjenkayáxinñara íjnko nkehe nduáhya. Kjánchó Díos sinchekjasóte kaín ti nkexro xritjixrónkáxin ti nkehe jína.

¹¹Kichóni, ti naxá chróndáxrjan kixin chrókua chojni xroye éxi t'etoan ti ley, la ti sin judío la í chrókónínkakahña sin. Ndá ti xikaha la chrók'uándaxiéhña sin ti itan jína chronka nkexrín k'uénxin Cristo ti ntacruz.

¹²Méxra ti sin ixri tjixronkáxin, t'etoan kixin itsara xroye, la ícha jína jehya jehó xroye chrókua sin. Náhí. Chrókóchrjín sin kuenté ti parte a.

¹³Jahara kichóni, Díos kjueyá ti jahara kixin tsaára.

Méxra chrókjuénkayáxinñara kixin jína chrókjuich'era kaín nkehe nduáhya. Ícha jína chrókjuinkĩtsa kichuara la ko chrótjuehéra kichuara. ¹⁴*Kixin kaín ti nkehe ndáchro ti ley mé t'óna éxi nkokoa nkehe la ndáchro: “Chrotjueheni kichóni éxi tjuéxini aséni.”

¹⁵Andá ti nchexiteyáhyara tíhi, ndá ninkákohénra kichuara la ko ntehe kichuara, la jahóra sinchek'itjáñara ti sin kichuara.

Ti nkehe tjajon Nchakuén Díos

¹⁶Méxra ndáxrjan: T'ejora éxi tjinkaon Nchakuén Díos, la chrókjuénkayáxinñara sich'era ti nkehe jínahña tjénkayáxinra. ¹⁷*Kixin ti nkehe jínahña tjénkayáxinra la tjajonko ti Nchakuén Díos, la ti nkehe tjinkaon Nchakuén Díos la tjajonko ti nkehe jínahña tjénkayáxinra. La yóí nínkakohen kícho. Méxra xitjahya sich'era ti nkehe jína tjénkayáxinra. ¹⁸Ndá ti tsitekáonra ti nkehe tjinkaon Nchakuén Díos, la í t'etuánhñara ti ley.

¹⁹Kaín ti nkehe jínahña ich'e chojni la xrahya tjatsqani: kixin tóxrñin sin tsochónta sin ókjé chojnichjin o ókjé chojnindoa, tjenkayáxin sin nkehe jínahña, la ko náxrjónhña, ²⁰tinkáchónki sin nkehe tsikjanõña, la ko nchexroan sin, nínkakohen

kícho sin, tjejá sin kjuanínkaon, chjio sin, xrahya tónínkaon sin, tjínkaon sin itsjé nkehe kixin jehó sin jína ts'ejó sin, tjínkaon ts'axrjentá sin, t'óxikayehé kícho sin, ²¹chjinoxíhin sin, tjàya sin, tjasin sin kia la tókoan sin la nduáhya tjenkayáxin sin, la ko tjenkayáxin sin íso nkehe jínahña. La éxi senó tjonkara, ti nkexro xíkaha ich'e la xrokjuahya tsjiji sin ti itjen Díos t'etōan.

²²Andá ti Nchakuén Díos t'etuehen aséni la tjeuhe kichóni, tsochéheni, kjuaxróxin ts'ejóni, tsonínkakonhñani, nkojína ts'ejókoni kichóni, tjínkítsani íso chojni, nchexiteyáni ti nkehe ndáchroni, ²³nkehiani la ko tjachani t'etueheni aséni. Ndá ti xíkaha sich'eni la kohya nijnko ley tsjanchia ijie tsjasótexíni. ²⁴Méxra ti chojni tinkáchónki Jesucristo, la ch'ehya sin ti nkehe tjínkaon cuerpoé sin, la í xraxinkakonhña sin ti nkehe jínahña k'uékjenkayáxin sin. ²⁵Mé xíkaha ti tjejókoni Nchakuén Díos, la ticháxin tsítōheni kixin Nchakuén Díos ts'etuehen ti jeheni.

²⁶La sinchenkehiani la ko chrókjuachaxínhñani kichóni la ko chrókóchjinoxíenhñani ti nkehe ich'e íjnko kichóni.

Tjínkítsara kichuara

6 ¹Kichóni, ti k'uíkonra nkojín nkexro kjuasin ijie, la jahara chontara Nchakuén

Díos, chrókjuínkítsara sin chrónixjehéra sin nkojína, chrókónínkakuénhñara sin. La kjáxin chrókóxakohanra kixin xíkahaña chrókjuásinra ijie. ²Tsjínkítsara kichuara kixin jehya nkoko chojni chrókuamá ti nkehe iye. Ndá ti xíkaha tjejoch'era, la chaxín tjejonchexiteyára ti nkehe k'uetōan Cristo.

³Kixin ti nkexro tjenkayáxin kixin imá tjeōan, ndá chaxínhña, la jehó ch'iehe asén. ⁴Nkojnko chojni chrórxaxinkaon á nchōxon tjejó o náhi. Andá ti nchōxon tjejó sin la chrókóchéhe sin, la chrótsjehya sin nkexrín ich'e íjnko chojni ⁵kixin nkojnko chojni chrókuamá ti ixra kjuajon Ìnchéni.

⁶Ti nkexro xrákohe ti itan jína, la chrókjuajon nkehe jína chrókuákja ti nkexro tjako.

⁷Ch'iyéhya asánra, kixin ninkexró tsjachahya sich'iehe Díos. Ti nkehe ts'enka chojni mé tíha tsotjá. ⁸Ti nkexro t'enka ti nkehe jínahña, la ti nkehe jínahña k'ueñka sin, mé ts'enxín sin. Andá ti nkexro ts'enka ti nkehe tjínkaon Nchakuén Díos, la tsotjá sin ti kjuachón nkochríxín. ⁹Méxra chrók'óxrjéhyani, chrókjuích'eni ti nkehe jína, kixin ti tsōxrjenhyani la ti ó tsjixraká ti ñao la tsotjáni ti nkehe jína. ¹⁰Mé xíkaha nkochríxín chrókjuínkítsani kaín chojni, la ko antsí chrókjuínkítsani ti sin kichóni tinkáchónki Ìnchéni.

Kjuixixín nixja ch'in Pablo

¹¹Tsjehéra nkexrín imá ihyé letra kjinxian tjaná. ¹²Ti sin tjako ley tjinkaon ts'etuahanra kixin chrókuara xroye kixin tjinkaon sin chrókjuikosáyehe sin chojni ó. La tjinkakohña sin chrókjuasóte sin kixin tinkáchónki sin ti Cristo kjuák'enkáni ntacruz. ¹³La kjónté ti sin tsíka xroye mé nchexiteyáhya sin ti nkehe ndáchro ti ley. Jehe sin la jehó tjinkaon sin kixin chrókuara xroye kixin tsonkexín sin kixin kjuacha sin k'uetoan sin kixin ikuára ti xroye. ¹⁴Andá janhan tóxrinahña sjintankexián tíha. Ícha jína chróndáxrjan kixin Cristo k'uenyákohen ti janhan. Kixin Cristo k'uénxin ntacruz, la

janhan í tjínkakhñña ti nkehe síin chjasintajni, la ti chjasintajni í tjinkakohña ti janhan.

¹⁵Ninkehó sínkíhya á chóna chojni xroye o náhi. Ti nkehe antsí sínkí la kixin chrók'ónani ijnko chojni nixin. ¹⁶La kaín ti nkexro titekaon ti nkehe t'etoan Díos, mé chaxín tsík'óna xjeen Díos, la ts'áyéhe sin ti kjuaxróxin kixin Díos kuikonoéhe ti jehe sin.

¹⁷Andá ijie la tjínkakhñña kixin ninkehró chrók'uekana ijie. Janhan la chonta ti tsíkjatsoenxín tsíchrít'o ti ntona^a kixin kjuasótexian ti ixra kuènté Ìnchéni Jesús.

¹⁸Kíchóni, tjáncháha Ìnchéni Jesucristo kixin chrókjuincheño ch'an kaínra. Mé tsoxiteyá. Ó tjen.

^a 6:17 *ntona* mi cuerpo